

四庫全書

集部

欽定四庫全書

集部
靜思集卷二

詳校官檢討臣德生

中書臣劉源溥覆勘

總校官降調編修臣倉聖脉

校對官中書臣潘奕馬

謄錄監生臣胡澄

欽定四庫全書

集部五

靜思集

別集類四元

提要

臣等謹案靜思集十卷元郭鈺撰鈺字彥章

吉水人江西通志稱其元末遭辭隱居不仕

明初以茂才徵辭疾不就集首有洪武二年

廬陵羅大已序亦稱其有經濟能自守今按

集中有辛亥秋詔舉秀才余以耳聾足躄縣

司逼迫非情因成短句一詩辛亥為洪武四年又在作序後二年則所謂能自守者信矣又癸丑首正詩中有盲廢倦題新甲子醉來謾說舊山川貞元朝士今誰在東郭先生每自憐之句是其不忘故國抗跡行吟志操可

以槩見又有乙卯新元六十生辰詩則其入明已八年矣跡其生平太抵轉側兵戈流離道路目擊時事阽危之狀故見諸吟咏者每

多愁苦之詞如悲廬陵悲武昌諸篇慷慨激
昂於元末盜賊殘破郡邑事實言之確鑿尤
足裨史傳之闕其遺集本藏於家嘉靖間羅
洪先始為序而傳之而其孫廷詔等不知編
次之法前後舛錯殊無義例以行世既久今
亦姑仍其舊錄之云爾乾隆四十六年十月
恭校上

總纂官臣紀昀臣陸錫熊臣孫士毅

總校官臣陸費墀

靜思集原序

桂林郭君彥章自其先世林礪先生得紫陽朱子之學於靜春劉公子孫世守以為家法後來若西牕先生謨溪先生皆能沈潛精敏深有造詣其所自得於先儒之議多所發明彥章固守其家法者也經亂以來遇事感觸情之所至勃鬱於中不能自己則輒形之歌詠或登高而嘯或臨流而歎扣壺擊節慷慨激揚商歌之聲隱隱動林壑聞者知其為妙也錄成編帙間以示予予愛

其題無泛作必有關涉章無羨句必有警發雖其片詞單言特出諧謔然亦未嘗不使聽者為之怡然喜赧然愧其於世道人物天理民彝有所感發是真得古詩人諷刺之義者歟亦其所養固有異於人歟使余序之余非能詩者也將何以為之言哉雖然余於彥章之詩亦不能無所感焉何也國風雅頌大抵皆古之樂章固必以音節為之主而詩本性情者也夫中人之性情不能不有所偏隨其所偏徇其所至則溢而為聲音發而為

言笑亦各有自得之妙焉是豈可以人力強同之哉漢魏而下詩之合作莫盛於唐然凡稱名家文章雖有淺深高下不可一槩論而未有不本於性情掩卷讀之使人自辨未有不得其人之彷彿者此不可強同之驗也以是知學詩者固當以涵養性情為本而不當專求工於詞也而近年以來江湖作者則徃徃托以音節之似必求工於詞而不本於性情譬之刻木為人衣之寶玉面目機發似則似矣被服瑰竒美則美矣然求其神情

色態出於天然自得之妙者終莫知其所在也又且專
掇取古人一二勝處藻績織組驟而讀之動心駭目又如
八珍之饌五侯之鯖幾使下筋無可揀擇後生晚進慕
而效之如恐不及直謂太羹玄酒為淡泊清廟明堂為
樸斲又詩道之一變也嗟夫抵掌談笑似孫叔敖豈果
似孫叔敖哉亦強為之詞耳彥章之於詩規矩音節盡
出唐人而不拘拘焉擬規以為圓摹矩以畫方而自得
之妙固在言外此余之所深愛也故書之卷末而歸之

彥章將以吾言為然乎不然乎彥章有經濟能自守觀其詩可見矣洪武二年己酉廬陵羅大己伯剛序

元鄙儒術七八十年間科舉詔不歲下山林之士無他慕因各肆力於文學於是多為古辭詩歌以道己志在吾族鄰而姍者有郭靜思先生與先翠屏諸公倡和往來而先竹軒公及里中宋周李楊諸君子固皆一時傑出者也茲數人者不獨能為古辭詩歌而已尤善測微隱明道理言又足以發之至其處貧遭遇卓然自守不

少涅流俗皆以為當然無用矯強使得一命所立必有可觀顧老於蓬藿不少概見餘其精神僅寓於聲律可哀也已靜思名鈺字彥章高村桂林人吾族志行甥壯年奔走資筆以為養晚際明興徵茂才辭疾不就年踰六十竟貧死常訪其家孑然無遺獨幸詩歌猶有錄者蓋平生經歷時勢艱危閭里流離之狀若目見之所載郡邑失沒日月與當時死事故實可裨野史有關懲勸而一時傑出相從唱和又皆世家文獻之徵不忍其泯

沒也因校訛舛屬其八世從孫廷昭入梓以傳憶靜思
贈吾族秀賓詩有云聖賢去我遠糜茲糟粕味當其得
意時何如卿相貴嗚呼此詩人所以窮餓終身而不悔
也靜思詩未知去古何若然一時傑出者後志止是不
亦可以觀國乎靜思酷好泉石所居去余蓮洞三里許
吟眺獨未一至將猶少之然歟必有為解嘲者嘉靖四
十年辛酉仲夏癸未蓮洞病樵羅洪先謨并書於念菴
之止止齋中

--	--	--	--	--	--	--	--

欽定四庫全書

靜思集卷一

元 郭鈺 撰

歌行

和劉氏蓬軒歌

往與丹邱仙人泛舟弱水之西採藥蓬萊之下笑坐蓬
牕中蓬外春如畫三生不得塵緣謝老去人間結茅舍
却羨劉郎所作之蓬軒山水娛人甚瀟洒春風淡沲春
雲陰花枝窈窕簾櫳深劉郎酒初醒獨坐蓬軒吟月浸

澄江鴈無影桂樹吹香秋夜永劉郎歌未終更向蓬軒
飲蓬軒飲後醉復眠樓船美人散如烟英雄迴首皆成
仙千金買閒不惜費何日蓬軒容我醉挂衣薜蘿落巖
花蕩槩芙蓉弄秋水夜半天風捲翠濤種來修竹齊雲
高待把長虹繫明月海上重來釣六鰲

題郭伯澄西菴山居

白日上東山晴光射西菴西菴山人開曉關一襟暖翠
濃如染門前流水玉虹明樹上啼鶯金羽輕自掃落花

客初到共題修竹詩先成十載戰塵迷道路西菴只今
成久住移竹春深長子孫種梅晚歲為賓主丈夫揚眉
天地間山林朝市俱等閒出為公卿入為士古人高節
非難攀聞君近年深閉戶烏帽青燈讀書苦劍寒新淬
冰雪光松老終無棟梁具西菴山深竹徑微我來欲共
薜蘿衣一朝富貴逼君去燕雀空羨冥鴻飛

採蕨歌

朝採蕨南山側暮採蕨北山北穿雲伐石飛星裂手脚

凍皴腰欲折紫芽初長粉如脂瘦根盤屈蛟蛇結吞聲
出門腹已飢猿啼風擺藤蘿衣長鏡短笠日將暮攀援
垠堦何當歸朝採蕨暮採蕨東隣老翁更悽惻抱蕨轉
死長松根妻子眼穿淚成血情知世亂百憂煎得歸茅
屋心懸懸痴兒啼怒炊烟晚打門又索軍需錢君不見
將軍擁旌節紅樓夜醉梨花月

畫山水歌贈楊彥正

憶我往歲山中居山水娛人忘讀書釣魚獨坐溪石久

看竹每過鄰人居蒼松鶴帶白雲下紫蘿猿抱晴烟虛
而我扶醉騎蹇驢誰人不道似是浣花之畫圖自從喪
亂走南北甚欲畫之不可得揚君揮翰頗風流雲山為
作秋三疊寒雅隔浦淡微茫老樹懸崖交屈鐵門前芝
草澗中石稚子松根採殘葉知君所畫非青原令我展
轉思故園山橋野逕宛相似桂樹正對梅花村清秋毫
末瘦蛟舞白日座上銀河翻問君何得最奇古十載苦
心思董元董元舊住浙江上門對吳山聳千丈有時登

高望海潮老懷揮霍增雄壯遺跡百年今漸亡戰塵千里吾安往但將此畫挂高堂清秋卧聽松風響

題秋江送別圖送楊亨衢少府叅安成軍事

楊少府紫駟馬黃金鞭團花戰袍繡兩肩腰下雕弓懸
迥若秋鷹解條鏃縱之颯颯凌千仞之蒼烟酒酣拔劍
玉龍舞喝令西飛白日回中天簸海腥風白波立壓空
殺氣玄雲連緣邊諸將亦無數畫擁旌旂夜撾鼓豹韜
合變待叅謀太守掄材君獨去送君江上君甚歡江風

吹雪蘆花寒知君心事如秋水故應寫入畫圖看問誰
畫者謝君績不畫琵琶美人泣舟子揚帆發棹歌主人
解劍停杯立我亦從軍今四年男兒姓名何足憐老親
白髮長相憶只得還家種薄田

送友人從軍兼呈謝君績參軍

歎息復歎息歎息長書空殺賊五年無寸功今者又送
君從戎七星戰袍襯金甲三山尖帽飄猩紅牙旂曉發
玉花驄猛士雙劍立西東爺孃妻子不用哭上馬更勸

黃金鍾黃金鍾琥珀濃豪氣千尺搖晴虹明日軍門揖
主將論軍未可皆雷同安成之寇容易攻廬陵凋敝遺
民窮自非竒謀決擒縱煩費日久誰當供君家伯仲盡
年少正好變化拔飛龍頗聞幕府多才雄為我問信毋
匆匆我有大羽箭不殺南飛鴻要如魯仲連繫書射入
聊城中祇緣骨相不受封不如扁舟歸去長伴滄浪翁

鶴將雛同李文麟賦

鶴將雛願雛長結巢千尺蒼松上自矜毛骨殊凡鳥不

敢向朝哺夕抱羽翼成風鶴雲鵬共還往挾彈子窺巢
攫其雛雛小豈能充爾腹老大育子恩勤渠荒村風雨
母歸急空巢深鎖寒烟孤哀鳴上下尾畢逋人之愛子
皆若子鷓鴣鷓鴣無處無君不見黃雀何足道楊寶飼
之玉環報

貽郭恆

月懸松露明鷓啼浦烟破遙想山中人此時正思我我
行急墮滄江邊度盡春風無一錢向來自是釣鰲客至

今思拍洪崖肩洪崖不可招蓬萊在何處鋪遍閒愁芳草
路千樹綠陰晝如雨錦字書成人不來銀燭花殘誰與
度近日聞君多好懷雪色白紵佳人裁小樓紈扇低徘徊
釀酒好近榴花開榴花開我歸來

效范先生侏儒行

君不見侏儒長三尺有錢可使粟可食虎豹天關深九重
直犯龍顏請恩澤方翔昂昂飢欲死每一見之長歎
息長歎息將何如東家之邱九尺軀遍走天下無停車

絕糧於陳逐於魯皇皇何用三千徒嗚呼皇皇何用三千徒吾寧飽死作侏儒

春夜寒

余值時危一窮到骨薪米不給恒自謂不敢
僥倖今春雨雪連旬擁牛衣以熬長夜寒砭
肌骨遂成疔瘡可感也哉貧而無怨聖人以
為難余今雖怨其又奈何發為詩歌私寫以
示平昔之窮交庶幾知已不為時貴所笑云

春雨暗空雜春雪閉門十日紅爐絕寒壓破衾夜悽惻
鼓角聲酣千轉側苦竹蕭蕭茅屋歌懸崖磔磔啼猿切
蒼檜拂風不自支碧桃醉曉何由得吞聲強起添牛衣
接迹不如投蟻穴立登霄漢奮長策死填溝壑抱奇節
奈何貧病相驅迫少壯幾時頭欲白更闌山鬼瞰孤燈
火攻水戰骨如折隣曲尋常疎往還妻孥劬瘁忘梳櫛
謬算平生坐不耕時危况復山河窄汗馬白丁樹功勳
儒冠俯仰無顏色讀書忍作公孫諛種菊願依陶令宅

志士百年慎語默誰云出處輕如葉每想淮陰酬漢恩
但欲功名垂竹帛國士從來不易知解衣推食寧為德
悠悠今古誰知心慷慨高歌唾壺缺君不見凍雀紇干
栖一枝彩鳳崑丘翻六翮

題三顧草廬圖

畫史紛紛滿天下君之此圖誰所畫倚山茅屋野人居
門前何得將軍馬得非孔明卧隆中坐令玄德來趨風
十載烟塵戰羣虎一朝雲氣隨飛龍英雄契合人莫測

宛如魚水歡相得抱膝長歌梁父吟上馬已無曹孟德
三分割據功業成用之惟在知人明千鈞漢鼎懸三顧
丹青欲寫空凝情嗚呼河北二十四郡墮名城君王不
識顏真卿

母棄子同劉茂才賦

母棄子子幼情可憐子長母還去為子宜思愆龍爭虎
鬪事翻覆寶玦王孫捐骨肉十年母子安茅屋菽水真
情無不足奈何一朝辭故幃子也慟絕牽母衣母今棄

兒不敢怨父在深恩母當念母如不聞竟不留黃昏門
掩青燈愁負米歸來飲殘泣他家兒女何綢繆噫噓噓
邇來萬事足悲咤負德辜恩滿天下丈夫盡為溫飽謀
婦人何得毋重嫁

題歐陽先生段君墓志銘後

翰林歐陽公文章滿天下段君墓碑親手題美玉精金
動高價雄詞傳世發幽光竒氣騰空照長夜段君有子
渥注馬榮親何待為卿亞白雲山空心共飛宰樹雨寒

淚盈把嗟我邑子棲林野白鷺青原徧儒雅今晨始得
讀君碑才名豈是尋常者鐘鼓清時金谷園衣冠前輩
洛陽社人間萬事力可為子孫振耀古來寡君家舊德
今見之復使鄉邦共悲咤何時却得拜君墳臨風絮酒
哀悰寫

題羅子澄所藏乃父晉仲文學桂林圖

我觀桂林圖喜極翻長吁江山城郭不盈幅恍若經行
千里餘官遊往歲羅文學此圖正為思親作戲綵魂飛

白鷺洲望雲腸斷楚王閣自從南北吹戰塵邊鴻不到
江魚沈有子芳年滯鄉國長日攬圖思桂林父在桂林
獨思母子今思父更愁苦太平干祿為親榮今日官高
渺何許還君此圖神凜然忠臣孝子無後先一家骨肉
眼前好百歲功名紙上傳君不見太真來作南洲客禿
衿老淚傷頭白

龍伯淵席上和周子諒長歌兼呈諸君子

伯夸登西山魯連蹈東海烈士懷苦心海枯石爛終無

改蕭蕭華髮吹秋霜夜煮白石充飢腸人情俯仰今異
昔惟有青山似故鄉桐江江上一攜手公子華筵誰不
有賦筆每慚崔顥詩持杯願飲茅容酒銀燭花高照座
空笑談頗有前賢風好懷傾寫向誰是或執螭蜺嘲神
龍老我疎狂眼常白欲麾凍蠅清几格不須浪說管鮑
交眼中誰有真顏色百年聚散如搏沙東風燕子還西
家羣仙天上擲飛霞君歸好醉瓊林花

送王醫

東風吹樹千鈞力怒勢呼號兩相敵回颺蕭颯入霜林
敗葉紛披散無迹老夫倚杖長歎息百年三萬六千日
莊生齊物物不齊誰鑄紅顏等金石王君笑我何太痴
太極初分有伸屈天根月窟窺端倪靈臺天迥丹光溢
奈何寸地攢千兵朝似瓠肥暮如腊自非一氣回孤根
宇宙幾何皆鬼域乃知變理藉登庸瘡痍變作謳歌入
感君此言足才識知君用心渺難及君不見長生之藥
蓬萊多從君歸去君如何

贈峽江王巡檢

淮海龍飛乘五雲攀鱗附翼多殊勲英雄變化不知數
我今獨識王將軍將軍好武稱第一慷慨功名少年日
劍術出奇愁白猿兵符借重祠黃石近報三軍掠薊丘
萬馬夜渡黃河流將軍豈徒成一障成功獨早還優游
巴丘官衙俯江水兩岸人烟鬱蒼翠不隨李廣獵南山
却向揚雄問奇字雕弓羽箭挂前除座中賓客多文儒
煮茶烟細浮蒼竹把釣江清出白魚人生宦途須適意

大隱從來在朝市將軍美譽播南州
纏腰騎鶴徒為爾君不見凌烟閣上
開畫圖褒公鄂公氣骨殊君臣際會
總如此嗟我閉門空讀書

題追風圖

百金曾買櫪上駒權奇神駿人間無
奚官絕力相控制出門已空千里途
大明殿前早朝罷揚鞭半是追風者
君不見拂狼獻天馬白髮江南今見畫

題宋仲觀所藏竹圖

金匱工尺卷之三
卷一
王猷愛竹借竹看何如寫此青琅玕筆分雲氣千畝足
窓涵風色三秋寒淡枝濃葉歲年久能使良工名不朽
君不見長竿千尺餘世上誰為釣鼉手

題劉履初所藏莫慶善鷹

日光懸秋雙翮齊欲飛不飛愁雲低足無條錠腹無食
空林尚恐難安棲筆力精到天機微莫生所畫待我題
君不見天下太平角端語狐兔草間何足數

送耒陽李中卿

干祿自為通滔滔逝水何時窮隱居自為介慘慘龍泉
闕光彩何如耒陽李中卿出也處也俱光榮往者時危
魯學武彎弓射殺南山虎一朝姓名貢玉堂朝回滿袖
攜天香祇今辭官歸舊隱五柳先生住相近石逕掃苔
客正來荷亭置酒花半開清夜夢回思舊事天語溫存
猶在耳却從雲氣望蓬萊百年窮達安在哉人臣大節
保終始滿眼官寮少能似泰山峩峩河水長君恩於爾
不可忘嗚呼君恩於爾不可忘

題郭元振所藏魚卷

往者觀魚曾泛洞庭舟
鯨飛蛟舞令人愁
不似君家翫
新畫滿眼潑潑仍悠悠
風急欲牽流
荇碧窻虛可數金
鱗密柳花吹動浪微生
雲氣流空墨猶濕
不須把釣凌
烟波對此其如秋
夜何萬頃波濤翻
白屋長篙棹月來
相過君不見聖代恩波及
魚鳥久矣龜龍在宮沼
池邊試問吃毫人
壁間變化春雷曉

送王葬師

南山改舊隴北山開新塋行人路上總稱好誰其相者
王先生王先生雙眼明吾聞其語心為驚江山隨運有
遷改人物乘機分重輕指揮能事敷元化何必長抱青
囊經嗟余獨居環堵室每一見之長歎息君家科第舊
聞名自經世變嗟何及河南南陽多貴人長平坑卒無
哭聲星翁筮史常相過專門堅白吾何憑衡嶽由來凌
絕頂青山有盡雲無盡更百千年似眼前春蠶畢竟誰為
枕東家求富西厭貧倒屣相迎如父兄伯牙抱琴子期

聽傾人意氣輕，千秋風江上。君重到爲君沽酒開懷，
抱杏花春早日邊開。松樹歲寒雪中老。

和李子晦

大鵬高飛絕南國，萬里扶搖六月息。歸來老屋翫圖書，
細看箕疇終用十。飄飄美人貯八斗，凜凜長身逾九尺。
技學屠龍未能試，桑田成海嗟何及。游泳詞林醉六經，
熟路何資鞭辟力。子陵不報故人書，商翁終爲太子客。
嗟余抱病深山深，慙與比隣少相識。破硯秃筆那復存。

惟有當年無孔笛四海交遊晚得君不意於余情最密
花落花開能幾日終不如孟郊韓愈為雲龍上下東西
不相失

戲惱王岳

春鳥啼春烟春烟醉春色花下彈琴酒微熱白日千年
秘丹訣誰憐曲未終花落絲絃折麟角煎膠不可得綠
楊香夢愁千結鏡奩絲碧網虫懸銀燭心灰淚痕滅青
樓歌舞艷名都年少雖同情各別暮雨淒迷青鳥避東

風搖蕩游絲白雪羅小扇不堪書腸斷桃根與桃葉音
塵隔露瀉瑤階踏殘月金鞍駿馬洛陽陌玉樓十二珠
簾揭鴛鴦野水空愁絕玉樓十二神仙客

控郎馬酬別蕭茂才

控郎馬妾心悲留郎駐郎苦辭少年只願封侯早不惜
蛾眉鏡中老銀鞍金勒珊瑚鞭白水青山千里道控郎
馬郎駐鞍郎飲莫須盡酒醒郎衣寒郎心懸懸五雲下
教妾若為控郎馬馬蹄好向御街行蛾眉不向粧臺畫

長相思

長相思相思者誰自從送上馬夜夜愁空幃曉窺玉鏡雙
蛾眉怨君却是憐君時湖水浸秋藕花白傷心落日鴛
鴦飛為君種取女蘿草寒藤長過青松枝為君護取珊
瑚枕啼痕滅盡生網絲人生有情甘白首何乃不得長
相隨瀟瀟風雨嗒嗒鷄鳴相思者誰夢寐見之

瑤花

花白色而變
淺紅而碧

瑤臺仙子初相見迴立天風飄雪練東華夢破歸去遲

素衣總被緇塵染芳心不委春蝶狂水晶簾捲凝清香
胭脂洗紅留淺暈海雲剪碧浮霓裳揚州璫花舊同譜
零落誰知到南土聞君愛花最有情亭臺五月清無暑
君不見花開今日多有酒不飲君如何

秋夜讀劉昕賓旭子夜歌因效其體賦三章

子夜歌聲苦短情苦多幾回待月月輪缺月當圓處
仍虛過銀燭窓深炯殘照玉釵半脫羅幃悄琵琶學得
奉君歡祇今彈作思君調

子夜歌歌罷其如明月何牽牛織女永相望不教精衛
填銀河妾心本如秋月白妾顏不共春風發玉兔搗藥
三千年近見嫦娥搔白髮

子夜歌承君蛺蝶雙花羅羅衣秋來不堪著梧桐樹上
涼風多銀燭作花好消息又想歸期在明日并刀不剪
相思愁相思誤盡曾相識

桂林樵者為邊季節賦

月中桂樹三千尺吳剛斫之不能得桂林樵者今如何

萬頃秋山白雲白樵者早年才力高論詩自許詩中豪
前輩衣冠識文獻中年詞賦舍風騷詞林藝圃渺無極
顛秀采竒隨所擇袖中玉斧光芒寒眼前不用生荆棘
舊來種桂高成林團團十畝懸清陰明月流輝夜如水
西風吹夢香浮襟客來有酒林下酌酒酣共說歸樵樂
江上漁翁尋舊約一聲長嘯山花落君不見南山捷徑
芳草迷東山別墅寒鴉飛明朝若過圍碁客斧柯爛盡
君無歸

哭胡洵

從楚金往
峽江死馬

胡生早年甚心苦自云恥與諸生伍讀書不免四壁空
世亂還須用吾武拓戟開弓筋力强一聞殺賊心飛揚
無官不得騎官馬擐旗走下千仞岡玉筍山前水流血
白日不回大刀折勝敗明知不可期廬陵要使多忠節
我來哭君淚滿衣君母老大君兒痴揚旂撾鼓徒旅去
孤雲落日精魂歸大夫樹勲當許國一死如君獨悽惻
君不見武昌兵八千盡向淮南看明月

曹居貞進士月下彈琴圖引

秋風瀟瀟秋月滿林彼美一人匡坐彈琴我一見之傷
我心問誰畫者天機精碧天瀉河漢思入秋冥冥不聞
絃上聲流水高山先有情想當美清夜音響何泠泠石
泉寒激山間深玉佩早朝天闕明月滿洞庭白鶴唳霜
飛巫峽元猿吟畫師真好手神妙豈在論丹青我獨不
見薰風奏虞廷螳螂殺心紛相仍烟塵擊鼓迴風腥我
欲破琴絕絃獨攜白石高卧長松陰重為告曰美人兮

美人抱琴自古求知音

同李主敬賦周煉師漁樵耕牧詩四章章十二

句

子何為漁碧海之丘長虹為綸月為鈎六鰲昂首愁相
向眼看海水不揚波扁舟穩繫珊瑚柯邂逅徐家兒與
女拔劍屠龍共君煮烟澹澹雨疎疎人間彈鋏食無魚
吁嗟歸來乎吾與爾漁

子何為樵閭苑之東璫林玉樹朝露濃攜斤剪盡荆棘

叢松下童子知何客長日圍棋看不得笑殺吳剛愁滿
霜千古桂枝碍明月石磊磊路迢迢人間饑火燒心焦
吁嗟歸來乎吾與爾樵

子何為耕瀛洲之曲玉山分雨秧苗綠蒼龍為耘虎收
穀炊烟晨起蒸為雲銀河晝洗塵沙昏釀成九霞為君
壽何必休糧苦長瘦草青青樹陰陰人間作苦秋無成
吁嗟歸來乎吾與爾耕

子何為牧蓬萊之麓自駕青牛度函谷鶴羣鹿子還相

逐芝草松間長未齊紫苔竹下行迹迷南山羣羊化為
石日斜歸去空無攜水泠泠山簇簇人間岐路往還復
吁嗟歸來乎吾與爾牧

寄彭中和

君來桂樹林我辭桂林去桂樹我所種高大已如許六
月濃陰繞茆屋不待花開可娛目駐屐從穿石上苔題
詩况有墻西竹小弟愛客開素襟兩載於君情最深短
棘本非鸞鳳棲長琴每作蛟龍吟君昔少壯抱奇節在

苒風塵頭欲白道義交從久更真風月笑談常自得江
西詞賦多才雄知君已有中唐風汗馬功名屬年少且
可草服山巖中海棠牡丹都賞遍磊落珠璣滿詩卷我
獨天涯塵俗塵白紵每愁顏色變丁寧小弟毋我違南
阮雖貧頗自竒桂樹花開新酒熟作書報我歸如飛

宋竹坡與余有延桂看菊之約竟不及赴賦樂
府一章以寄之

桂花開菊花開祇為花開自合來何須問酒盃
掃蒼

苔惜蒼苔風月應憐小宋才佳期待早梅

同劉伯貞題袁氏寓軒

穹窿攜白日百年幾旦暮變滅乘化機萬物孰非寓鴻
濛不可超金石豈為固况茲無根蒂自當隨所遇聞君
闢西軒僑立延佳趣種竹新作林移花整當戶蛛絲閃
晴輝青松沐朝露久客賒酒易親舊時相聚臨眺登崇
岡故山渺何許月明金鳳洲夢魂自來去少陵浣花溪
管寧遼東路當其適意時何必皆吾土干戈尚未已邱

園安得住雪泥留鴻跡華表遺鶴語茫茫宇宙間蟻垤
終誰據我亦東西人長年忍羈旅相從豈云遠即此馳
音素須留酒一罇剪燭聽春雨

靜思集卷一

欽定四庫全書

靜思集卷二

元 郭鈺 撰

五言古

芹寓為安成彭伯圻賦

泮水過新雨
官牆度晴雲
於焉沐膏澤
素心託芳芹
悅玩永朝夕
采擷奚足云
淪漪映寒翠
光風泛微薰
野人分有限
安敢獻大君
聖化之所濡
生意何欣欣
上林滿春色
懽樂非所聞
始知君子心
希聖良獨勤
紛華念俱

絕淵源思不羣願言美真味盛德在斯文

心雲詩為羅宗仲先生賦

浮雲南山起還復歸南山騰騰駕輕風悠悠度松關仙
翁坐盤石心與雲俱閒冥觀元化初吹噓膚寸間蒼龍
變神化為雨徧九寰六丁封江湖空捲驪珠還無心乃
無物瑤琴相對彈

袁州有警不見舍弟銛消息

客行何倉皇挽衣問消息答云避寇初元戎先我出哉

我宜春臺烈火半天赤雙龍蓄雲雨不救烟焰赫城中
千萬家大半殲鋒鏑前者見令弟少髭而白暫語語達
人情謀身豈云失問道苟無虞生死候明日倉卒棄吾
兒君弟我何及揮手謝客行奮飛恨無翼復恐老親聞
黃昏掩殘泣

壬辰閏三月初三日銓弟歸因錄其語奉呈楚
金諸君子

入門伴母啼出門聞鵲噪握粟卜靈龜之子歸已到饑

走涉一旬形容盡枯槁閭里共歔歔且慰慈闈老問答
憚語煩客滿始相告羣寇窺無人鼠穴窮剽盜承平宿
將死戰守自顛倒九江咽喉地戎卒何草草宜春坐不
救吾土敢相保惟當學義旂戮力事誅討賊衆亂且囂
一舉秋葉掃廬陵忠節邦足以正窮昊鬱鬱英雄姿封
侯何足道惟我最迂懶聞之展懷抱振衣舞龍泉請作
三軍導

重過胡洵宅

洵字宗美

入門見桂樹出門問桂樹桂樹相送迎主人竟何處高
葉鳴悲風疎花落殘雨獨立黃昏烟思遠天涯路

東王志元四首

山深草屋寬溪迴樹陰綠脩脩圖畫開斯人美如玉芝
草長未齊今晨雨新足開門掃落花坐石看修竹天遊
邈難知避世何忍獨白雲歸未歸借我半間屋

戰塵暗南國白日無晶輝客行何慘戚途窮不忘歸語
及國家事老氣晴虹飛朝飲南山水夕採西山薇嗟彼

反側子捐軀逐輕肥寒餓良細事大義有是非

叢蘭被幽谷紫蕤含露滋山深寡行迹甘同秋草萎春風偶披拂遂為高人知高人不取佩持以慰所思紅塵紫陌間灼灼桃杏姿人心各有愛遺之亦何為

海月上蒼茫照我中庭正香霧出簾遲微風動花影冷
冷綠綺琴拂拭塵埃淨一彈作新聲再彈成雅韻三彈
曲未終感激誰與聽肅衿遲子來無負春宵永

同周愷子諒賦老人會詩二首

時危親戚散况乃多賤貧
曠茲老人會為樂難具陳
生子競榮達志養俱獲
伸朝出共寮采夕歸為比隣
異姓歡愛洽不殊骨肉親
起居迭相送惋愉盡情真
繫我豈無母半菽長苦辛
願言敷治化枯槁皆同春

板輿度晴陌綵服迎春風
今日良宴會慈顏和樂同
翠翹髮垂素錦筵花綴紅
萱草春日好栢樹雪未融
縹緲瑤池母並集蓬萊宮
自非有令子世亂徒飄蓬
於焉倘錫類頗勝平反功
乃知晉潘岳閒居賦未工

送王鎬之邵武省親

鎬字仲京

青青楊柳陌之子晨巾車去鄉不云苦攬轡馳復驅嚴
君守名郡長懷音問疎再拜問起居千里歡有餘綵衣
捧綠酒紫袍映白鬚上言尚書軍聲振東南隅下言太
夫人年高色敷腴我雖邑子賤問信抱區區官察展良
覲見子文采殊定云渥洼水生此汗血駒故家三槐樹
功名遂良圖願言慎徒旅令德忠孝俱

將歸桂林留別王志元劉象賢二首

耿耿念慈闈戚戚別親友屏營臨交衢淚下多於酒去
留兩不忘衷腸亦何有道誼託襟期取別無新舊荏苒
風塵中會面何時又好為頻寄書毋使長回首

志士慎唯諾况乃出處間白圭微有玷噬臍良獨難富
貴非苟得貧賤當自安干戈今若此誰測衰盛端明當
為遠別為君吐心肝願言保貞節深居且加餐

和王錫仲京自閩見寄兼簡歐陽文周

我惜晚聞道靈臺襟主客冥行不知津臨危始求楫年

邁悟前非端居寡娛悅聖賢
遐軌中道豈容歇駕蹇
不受鞭出門有難色平生歐陽子
肝胆無楚越夙昔諧
素心窮達最貞節
結交得斯人馬用復多閱
王郎晚相逢更覺才情別
泳游文海中深淺力
窺測欲振蓬萊音
不同箏笛咽老氣蒼旻
高雅懷秋水潔蒹葭
推折餘幸託瑤林側
柰何風塵起干戈積
歲月牛衣卧空谷長夜
獨愁絕自君入南中
板附不可得昨蒙求友
篇情誼何淪浹恨無
凌風翼就君共劇切鬱鬱
長相思秋月幾圓

缺持報愧琅玕永言銘厚德

濠石晚樵因簡李撫伯謙

出山復入山流泉逶迤送暝入黃葉深濕分白雲重棘
荆攢徑危側身抱深恐春花自芳妍春鳥自鳴啾悠悠
徒旅間何由免寒凍老親嗟我勤歎息中腸痛肩頰只
自憐囊罄當誰控學劍惜已遲讀書亦何用國步政艱
危高官選才勇李君舊知己風格鬱清聳光怪匣中龍
文采雲間鳳庭幃壽且康甘旨日相奉避地雖云同樂

事誰能共知君懷遠畧臨機不妄動戰爭奈未已發策
必奇中何當展才力青雲縱飛鞚

聞龍興警報有懷歐陽奎

君子憂朝廷野人念親友壤壤吹戰塵金湯無固守自
聞消息來十日不飲酒生死不可知何論別離久秉心
思潔身饑寒且東走涉患始還鄉還鄉復何有吐此將
奈何迸淚空回首

悲廬陵

至正十六年丙申冬袁州兵逼城屯藤橋丁

酉正月義士廬陵陳瓘出屯城北之青湖二

月吳都事命兵校明某下桐江計事不報入

蘭溪召不至五月桐江李彬誅六月袁州兵

退秋明某歸遂以其屬屯太和之永和十一

月明某矯殺騎將林伯顏武端不問十二月

全叅政答其部將某某戊戌正月朔庚子戊

午叅政兵亂逐鎮撫吳林三月梁太守卒安

成兵自去冬侵掠北境旦暮至四月至桐江

五月初四退初十戊申分宜義士袁雲飛導

沔兵至桐江己酉義士劉照與戰于吉水之

灘頭庚戌明某以都事之衆降辛亥傳於城

錄事張元祥與攝監郡雅某降全叅政奔贛

裨將降叅謀鄉貢進士吉水蕭彛翁死之是

日陳璣召安成兵入城六月吳都事將其屬

居吉水之蘆兜此吉安再陷之畧也

峩峩青原山洋洋白鷺水炳炳照輿圖磊磊足多士四
忠與一節流風甚伊邇往者舉義旗事由匹夫始連兵
七年間省臣兼節制朝廷寄安危幕府保奸宄勢驕改
令圖反側久窺伺紅旂溯江來羣雄盡風靡今日賣降
人昨朝清議子奈何英雄姿因之穢青史朝為龍與虎夕
為狗與彘流芳動百年遺臭亦千祀嗟余父母邦何忍獨
深訾所恨寧馨兒磔磔不得試賴有蕭叅謀殺身刷深
恥我欲裁白雲緘情問生死哀歌裂肝腸臨風淚如洗

秋日撥悶

疎煙點寒蕪落日低茅屋
哭子淚未乾哭女聲相續
喪亂多憂虞生死何榮辱
獨憐白髮親無以娛心目
小姪早粃粃歲艱缺饘粥
數椽燹火餘鬱攸忍相感
余辜信有之天弼亦云酷
桂樹萬黃金可玩不可蓄
貧富非我能出處誰從卜
買臣非漢武負薪終碌碌
側聞西山巔薇蕨寒猶綠
倚樹畫軒楹願依白雲宿

送羅彥思往閩中候迎大父

天倫有真樂家慶傳新圖人生百年內于焉始為娛爾
翁老京國風霜搖鬢鬚爾父奉慈闈干戈沈里閭豈無
饘與粥朝夕不得俱眼穿孤飛雲心折反哺烏近者消
息真萬里神明扶沈思供子職內外懸君軀投袂出門
去父母何勤渠朝迎暮望返少壯輕畏途見翁問起居
同舍相驚呼孫已如翁長子應似翁癯時危久離別會
面當何如歸期諒不遠春酒為君沽再拜千歲壽親戚
多歡愉卿相何足道勝事世所無願言慎前路明發毋

躊躇

送別郭恒

作客似楊花送別楊花側楊花風際飛那復計南北
曉棹洞庭波暮鐘廬阜月應笑山人閉門頭雪白

夢覺

風舞參差花月照往來道十載不相逢恍然共懷抱計
年華髮生何得容顏好近事雖難知舊愁忽如掃奈何
微醉醒鷄唱心如擣情知夢非真頗恨覺來蚤瀟瀟風

雨聲離思滿芳草

題贈溪上翁

涇邑柘鄉宋氏

白髮溪上翁結廬溪上住
風暄花滿衣水暖魚吹絮
隣曲相邀留酒酣獨歸去
忘却釣魚竿挂在垂楊樹

和郭恒

罷釣澹忘歸看花北山谷
不知春事深黃犢無人牧
對酒斫白魚題詩滿青竹
隣翁記疇昔笑我剗節目
苟免征戰危敢避泥塗辱
明日有餘罇候君到溪曲

大雪中羅伯英見過

大雪破絮溫高眠及辰已忽聞扣柴扃不語知竒士獨
行何飄翺海鶴乘雲氣玉界瑠田中神仙足風致云何
剡溪船高興一時廢貧家飯脫粟菘韭自無備且復倒
餘樽燎衣語文字聖賢去我遠縻茲糟粕味每當得意
時何如卿相貴人生俱有營俯仰期無愧冠鄧列雲臺
嚴陵釣江渚不聞青史間馳議相軒輊嗟我窮卷子賓
客少能至况茲風雪中塵塵見君意感歎不可留臨分

更攬袂回首北山巔松柏鬱蒼翠

甲子

淵明賦歸去正合書義熙衣冠晉江左寄奴我何知春
秋乾侯筆凡例日星垂誅心雖探微臨難將安施乃知
書甲子當在永初時古人日已遠澆風日已漓空餘五
柳樹蕭瑟西風吹

語童子

童子攜春衫好去換春釀隣翁來相過林泉共幽賞移

席近花間題詩在竹上垂老惜交情毋令默惆悵

別羅昶

少小涉憂患未老容鬢改任情墮踈慵事往不可悔旅
食玩炎涼屢空蠹光彩出門誰與言見君獨長慨幽蘭
閔秋香空谷若有待霜露淒以零明日誰當采山鷄囚
樊籠羽翮日以斂見者不憐傷雲山渺何在今人不我
期古人不我待琴聲發鏗鏘劍光吐竒怪得奉君子歡
綢繆涉三載去去憐此辭良晤何由再

與客談鄒超因賦

鄒超一白丁凜凜節士操揮戈回白日日沉戈亦倒使
其綴朝班不愧國中老遂成薛侯名宇宙忽新造煌煌
天使星輝光照窮昊老守衆所推深意完城堊判筆負
所期丹心向誰告城中百萬家稽首忠厚報薛侯今有
孫家聲宜自保鄒超不再見耆舊傷懷抱臣各為其主
生死盡其道我生百年後俯仰憂心擣側身望青原寒
烟黯秋草

齋居苦熱以大盆盛水置前坐卧對之心目清
朗是亦用水之義也

炎埃不可掃何以清我懷銅盆汲寒井捧盆置西齋吐
嗟一室內澆漾江湖開風漪浮席動雲影入窓來一清
挹衆綠涼意浮庭階雖無瓜李設即此權相陪來客盡
君子淡交性所諧嗟彼附炎者長路迷黃埃

早秋陪楊和吉曉登前山望桐江

白鶴導晨從涼颼起林杪振衣凌高岡極目窮幽渺蕭

蕭草樹秋歷歷人烟曉依微玄潭觀羣仙在林表下有
塚纍纍世事誰能了桐江滙章水晴漲何渺渺曾不瞬
息間一帶縈沙小無怪豪傑區烟蕪怨啼鳥盛衰兩相
乘玄悟良獨少君今脫塵羈相從得閒眺題名刻石苔
借蔭憩叢篠白紵含餘清稍覺心情悄山市門初開飛
塵已紛擾

閏七月十六日山中早發

宿雨剩微涼遊雲弄新旭客子將出門陰晴苦為卜驅

車涉前途今夕投誰宿雨久愁躋攀日長畏炎燠使無
塵故縈在家貧亦足天意詎得知疇能遂所欲俯看山
徑泥來往滿新躅

秋夕王楚善過宿

片雨灑空庭梧桐響殘滴窻戶涵清風孤燈夜寥閨渺
懷平生親睽違不相識公子幸過從為之長歎息意曠
塵慮空語到聰明入山徑披榛蕪晤言永今夕物變心
自傷事往嗟何及遠大與子期無踵炎涼迹

和宋時舉見寄

浮雲不為雨出岫期無拘蒼龍偶借勢影迹隨風除懸
知市朝上不似山巖居送客限門外嗟彼馳交衢為農
甘沒世何必衣冠儒君居崆峒上自與人事睽清高
沉瀆念我纏寰區託交匪朝夕無論出處殊山水有佳
趣且此寧君軀

聞周子諒訃

丈夫志耿介臨別仍傷懷况茲泉臺路一往不復回憶

昔送君去知與素性乖微官淹歲月悲風從天來老淚
為君盡寸心為君推士林黜憔悴功名安在哉始知嵇
阮輩甘心沉酒盃

十二月初三日大雪與同宗弟文昌飲懣時忽
落一齒遂賦

垂老驗盛衰深憑齒與髮髮白歎吾衰齒落衰已極利
害髮不任養生資齒力無間藜與藿得以娛朝夕次第
相動搖世事嗟何及吾舌雖云存苦乏儀秦術修短未

遑徵得酒姑自悅天公構巧思
六花舞飛雪條盈還忽
消鴻爪無遺跡古來豪傑士
文字畧相識是非紛與奪
視今如視昔寄言後來者
人生當自適

峽江道中

去鄉已百里避地何時轉
歷歷墟里殊稍稍語音變
妖狐似鬼啼落日人烟遠
遙睇層峯高平地是交戰
流水為誰哀嗚咽相迎餞

過羅仁達別墅

架石東飛濤結廬枕幽谷縹渺紫翠間孤松立雙鶴主人坐清陰候我渡溪曲盤渦搏落花茶烟出幽竹相對淡忘言月明山下宿

二月十八日隴洲夜渡


江波展素月好風吹衣巾扁舟動寒碧恍朗開金鱗心清挹沆瀣神遊挾仙真獨恨迫兵火倉皇來問津豈不欣所遇終焉銜苦辛君王甚神武何時息戰塵歸舟如到此月色應更新為君換美酒長歌酌江神

送別李騰還鄉

別離古云苦况值兵未休慈烏夕反哺蝮蛇寒出遊料
事每成錯去住難自謀東風捲飛雨添我雙淚流憑君
見親舊道此情悠悠

送人之臨川

聞君適臨川臨川幾時到日色江上舟雨香沙際草側
聞吳先生挂冠已云早邂逅道深期故山白雲好



靜思集卷二

欽定四庫全書

集部
靜思集卷
三五

詳校官檢討 臣德生

中書 臣劉源溥覆勘

總校官降調編修 臣倉聖脈

校對官中書 臣潘奕雋

謄錄監生 臣胡澄

欽定四庫全書

靜思集卷三

元 郭鈺 撰

七言古

賦丁氏悠然齋兼呈羅宗仲進士

金山西來森萬木
幽人結廬枕山麓
入門所見勝所聞
先生弟子皆無俗
芸草晴香攤古書
竹簾晝永開碁局
陂水門前春浸綠
一支分入清池曲
搖曳瑤絲雙屬玉
意閒似與忘機熟
清曉開門掃落花
細雨分根補秋菊

鶴歸帶得南山雲夜來共就簷端宿溪魚入饌白如銀
春酒醱醅香滿屋客來留飲醉為期人生樂在無拘束
知君心事媚幽獨不肯低頭狗榮辱感君於我情最深
每有篇章親手錄羅浮老仙卧雲谷為問淵明舊芳躅
相從更作秋風期借我高齋看脩竹

環山亭

袁氏為奉
親而築

環山亭上看山好我獨愛君親未老築亭當日為娛親
不計春歸與秋到捲簾雲拂老萊衣折花香撲雀御帽

四面烟鬟翠相抱中峯屹立當晴昊蒼松老柏鬱難攀
白鶴元猿共幽討怪石槎牙獻竒寶澗水泠泠入琴操
隣叟時邀共酒杯諸孫日遣傳詩草婉容愉色春融融
稍覺龐公近枯槁華萼弟兄永相保金谷賓朋何足道
百年父子樂且真始信人間有蓬島我欲訪君待秋早
楚江釀酒宜傾倒寄書更約安期生攜來海上如瓜棗

黃氏容安樓

君家高樓高百尺樓間把酒無虛日極目欲窮千里心

誰謂區區僅容膝捲簾半空雲氣入孤鶴長鳴楚天碧
醉拍闌干呼月來萬壑松風夜吹笛天上玉京十二樓
羣仙不帶人間愁曉飛霞佩來相訪攜我共作丹丘遊
今日之日君我留為君題詩樓上頭笑指樓前大江水
古今人物共風流

題劉文周愚直齋

先生結屋龍湖上大書愚直懸齋榜松風夜挾秋聲高
山雨晴添湖水長一窓燈火聞書聲洞視太古凝幽情

商周以前足人物儀秦而下非功名古人今人各如此
先生意向知何似高風誰學柳士師夜雨閉門魯男子
先生長笈心自閒葛巾草服開松關寶珠光燄照雲水
好詩題徧龍湖山我遊梁楚號狂客飲酒呼盧都不擇
鳳兮鳳兮歌思哀老去人間拘小節甚欲相從讀舊書
何時下榻容安居是是非非吐心膽先生真是古之愚

賦清溪

清溪之水抱幽谷盤渦細浪相盪感半篙晴日蕩金鱗

一帶秋煙溜寒玉溪上仙翁絕塵俗開門俯溪飲溪綠
白鳥飛來明鏡中垂楊鎖斷闌干曲窈窕春花亞脩竹
脩竹何人共碁局紫羅為蓋草為褥如輞川圖懸一幅
嗟我早年厭羈束五湖風月醉心目祇今是處沸鯨波
把釣從君事亦足

題周季彬竹洞

周郎早歲才名重華屋連雲接飛棟却耽野趣愛幽棲
種竹迴環結成洞洞中坐客雖不多洞中車馬長相過

微風敲玉鬱清爽濕烟環翠涵清和石峯嵯峨儼賓主
紫苔帶得春前雨翡翠晴連覆酒杯琅玕日長添詩句
簾紋如水形神清萬葉為屋竿為楹朱光不到失昏晝
六月髣髴聞秋聲嗟我村居逼樵舍此居稍覺情緣寡
正擬相從共笑歌不緣一看忽忽借

題李次晦溪山間

往年走馬遊長安杜陵韋曲花未殘玉堂天上春夢斷
拂衣歸去溪山間溪山之間深且好主翁見客開懷抱

花氣晴熏白紵衣，波光遠浸紅雲島。
長松吟風晚泠泠，松下酒醒彈瑤琴。
松聲琴響自相和，消盡人間名利心。
臨溪結屋看山色，山下行人招不得。
猿嘯烟深挂紫蘿，龍窺水冷吟秋月。
主翁心閑一事無，諸郎文采珊瑚株。
南山射獵非所好，芸草懸香惟讀書。
竹徑曉開邀二仲，白鶴相迎復相送。
風月西窓詩料多，酒熟何時添我共。

題鄒茂才讀書處

鄒君昂昂二十餘，世味不好好讀書。
今年新作讀書處。

青山白雲閒畫圖屋前老樹滿千株濃陰晴抱溪光虛
架上牙籤醉白魚窓前鐵硯愁蟾蜍水沈香裊銅花爐
竹梢滴露自研朱十丈風埃葦簾隔三更秋雨青燈孤
吐氣欲吞餘子輩冥心獨遊太古初門外來者皆吾儒
羨君文采時時殊聖經賢傳多貯儲大義所得無拘拘
臯夔稷契何所讀篋瓢陋巷誰與居出門千里慎所趨
會看風翮排雲衢我今老矣慚不如贈君又無明月珠
為君長歌敲唾壺

羅友諒靜樂園

老大為園殊不惡人間富貴浮雲薄官曹賭命擁輕肥
不似先生靜中樂靜中之樂如可用鶯啼燕舞嬌春風
貯酒經年偏為客雨餘剪韭寒薦菘靜中之樂不可畫
游絲裊空碧桃謝滿前詩景取次收諸孫捧硯花陰寫
午憲客散還復眠長年習靜如得仙投壺聲悄停梟箭
篆香灰冷消殘烟我居近市厭囂聒老圃荒涼嬾耕作
朗誦先生靜樂篇白鶴風高入寥廓

秋塘曲

高荷擁翠秋滿塘
花開不見聞花香
老魚吹波紫萍碎
花下飛起雙鴛鴦
鴛鴦相逐低迴翔
藕絲易斷愁心長
玉笋不彈轆轤梢
一簪華髮凝秋霜

溪西靜者為安成周鼎傳賦

先生下筆妙天下
好從天上騎天馬
却將富貴等浮雲
自號西溪之靜者
溪西池館門常關
綠陰滿地清晝閑
碁聲不聞賓客退
先生夢到希夷間
世上利名爭賭命

誰似先生獨能靜心涵太極易書存吟到盛唐詩律定
我今結屋萬山中出處似與先生同南州久已無高士
牀下終期拜德公

冰山謠

黑風聳扇海波立冰山嵯峨聳千尺樓觀晴連蜃氣高
金銀夜貫虹光赤上有異物騎於菟左手鞭熊右麾驅
彎弓射天鬼神泣憑凌殺氣搖荆吳狡兔爰爰何所得
百計穿窬作三穴父老相逢不敢言夜對妻孥淚成血

一朝白日中天開
冰山融液非人推
淋漓后土滿泥濘
笑聲變作啼聲哀
前者已傾後者踣
出門却恨乾坤窄
秦關逆旅商君愁
楚國飛車觀起裂
早知冰山不可保
何不委身平地好
從今寄語問津人
風雨西山薇蕨老

陪歐陽奎文周秋夜宴集

高陽酒徒厭拘束
洞簫清夜吹寒玉
月影微生滄海波
秋聲瀉入南窓竹
主人好懷為我開
前除掃葉剗蒼苔
移席傳呼秉銀燭
飛觴不惜空金壘
百年交契亦無數

且得共君長夜語
蘭苕翡翠自春風
延平劍合蛟龍舞
我家茆屋江之西
門閉不聞車馬嘶
攜書樹底騎牛讀
得句樽前洗竹題
酒酣拊缶山谷響
聊共漁歌答樵唱
此時半面未逢君
何乃見之輒稱賞
論交不論淺與深
大夫一語輕千金
白璧無瑕人所貴
青雲有路我何心
簫聲不斷酒如注
泓下龍吟月涵霧
仙人招我歸去來
雲車相候蓬萊路

美人折花歌

美人折花粉牆曲花前背立雲鬟綠乍愛薔薇染絳霞
還惜海棠破紅玉素手纖纖羅袖殷心情凝想金刀寒
低枝未吐精神少高花開遍顏色殘花刺鈎衣花落手
草根露濕弓鞋繡紫蝶黃蜂俱有情飛撲餘香趁人久
情知人老不似花花枝折殘良可嗟明朝棄擲粧臺側
綠陰青紫愁天涯

送遠曲

為君治行近一月今晨竟作匆匆別枕邊紈扇鏡中花

一時盡變傷心色，妾雖不見邊城秋。君亦不識空閨愁，
憶君便如君憶妾。雙淚豈為他人流，才貌如君長刺促。
少年心事何時足，歸期未定須寄書。誤人莫誤燈花卜。

悲武昌

武昌兵甲雄天下，王孫節制何為者。白馬將軍飛渡江，
壯士彎弓不敢射。玉船未過鸚鵡洲，紅旂已簸黃鶴樓。
美人散走東南道，一絲楊柳千絲愁。戰鬼銜冤夜深哭，
王孫獨在淮南宿。淮南美酒不論錢，老兵猶唱河西曲。

九江昨夜羽書傳
九江太守愁心懸
馬得將書報天子
哀哉不識顏平原

贈周郎

白馬渡江赭衣舞
青春殺氣吹吳楚
豪傑如雲起義兵
盡說周郎才且武
鎡金伐鼓駐江許
麾下健兒猛如虎
大刀照日開雪光
飛鏑穿雲落鵬羽
亦知困獸死猶鬪
轉戰大呼髮毛豎
馬鞍曉被帶冰霜
刁斗夜鳴雜風雨
黃河不見官軍渡
青天白日丹心苦
國家養兵八十年

不斬蛟鯨伐狐兔自非忠義激心肝誰肯艱難越深阻
昨者懸軍大捷歸聲名歛起元戎府前獻俘揚虎旂
府中把酒歌都護江南布衣有如許政好歸來奉明主
選將壇高拜天語中官促邱黃金鑄坐遣丹丘拜狹猢
天下蒼生各安堵虎符將軍何足數

少年行

西家少年茆屋裏牀擁牛衣瓶貯米一朝販鹽多白銀
妻學宮粧兒學跪甕頭新酒鵝兒黃無時殺猪宴隣里

酒邊自數還自矜眼前華屋連雲起指似中男眉目強
早教讀書結豪貴黃金直可賭公卿莫遣終身在泥滓
東家老儒笑無計一窮到骨門長閉百年榮悴那得知
世情直付東流水

鄂恒惠牙刷得雪字

老氣稜稜齒如鐵曾咀奸腴噴腥血倦遊十載舌空存
欲挽銀河漱芳潔南州牙刷寄來日去膩滌煩一金直
短簪削成玳瑁輕冰絲綴鎖銀駿密朱唇皓齒嬌春風

口脂面藥生顏色瓊漿曉漱凝華池玉麈晝談灑晴雪
輔車老去長相依餘論於今安所惜但當置我近清流
莫遣孫郎空漱石

贈彭將軍

將軍昔從布衣起便欲賭命報天子里中父老得開顏
刺虎斬蛟良細事幾年汗馬鏖戰塵君門九重誰得陳
羽檄飛雲白日暮牙旂捲雨滄江昏中書大臣擁貔貅
吐氣如雲蓋南土豫章城頭鳴老鴉匹馬夜出杉關去

楚山蒼蒼楚水清
草莽之臣何重輕
但得嚴君脫虎口
皇天后土相知心
誰想長材不終棄
控搏造化真兒戲
東隣早結丞相懽
種瓜不到青門地
君家屋前山水幽
正好歸來尋舊遊
座上衣冠戲綵日
窓前燈火讀書秋
我欲從君語疇昔
悠悠世事嗟何及
滄波東逝魚西飛
獨振布袍三歎息

負薪女

山下女兒雙髻垂
山上負薪哭聲悲
辛勤主家奉晨炊

主翁頭白諸郎痴，干戈未解骨肉離。
生米不識妍與媿，長筭隣姬畫蛾眉。
金屏孔雀何光輝，琯弓羽箭來者誰。
綠楊終日青驄嘶，人生年少如駒馳。
鴛鴦翡翠皆雙飛，愁思百結心自知。
負薪拭淚背人揮，黃昏四壁寒螿啼。

和羅貞仁達見寄

紛紛世事何為者，殺氣騰騰空龍戰。
野萬國瘡痍未得瘳，十年奔走終無暇。
痛哭呼天晝杳冥，淚痕血點布袍腥。
愁霜逐日催人老，厲階在昔知誰生。
憶昨先皇振天怒

盡四海外遵王度官曹襄馬連青雲父老謳歌足春雨
我自甘為樗散材石田山下鋤蒿萊骨相判知無肉食
對客長策心悠哉先生未肯老邱壑雲海蒼龍奮頭角
碧桃紅杏皇州春綠誰竟負看花約空谷著書追昔賢
文章落手人間傳長風吹雲出山去使我不見心懸懸
出處情知各有志故舊何人共心事離別中年自不堪
芳草閒愁滿人世海波幾許成桑田麻姑消息魚沉淵
小山桂樹秋風老待君歸去知何年

寄李尚文少府兼簡周仲元

蓬萊歸路渺何許美人相思隔烟浦青鳥飛來雨意遲
黃鸝啼醉花陰午江邊釣石甚竒古一絲柳風獨延佇
囊罄久無沽酒資詩成何得驚人語李侯金閨聲價高
往來意氣凌吾曹官舍臨湖懸綵棒酒杯勸客濕官袍
不擬東籬種秋菊欲從上苑醉仙桃寧知淮海風塵起
黃鵠委翅歸蓬蒿去年東走共顛倒茅屋寄宿憂心禱
九月絺衣敵早寒萬事不如歸去好拾薪煮雪我常貧

掃石卧雲君計早古人成敗每輕之及此始知難自保
近日攜書尋舊遊江上孤舟滿載愁偶見周郎共樽酒
一談一笑何風流主賓二妙不易得我欲從之長滯留
相思且付楚江水江水不盡情悠悠

題秋山風雨圖

平生最愛米家畫君之此圖妙天下烏分歸路雲不開
樹壓懸崖雨如瀉倚江茆屋何人住蘆竹蕭蕭出無路
似我還山烟雨中愁來只讀秋陽賦

同羅伯剛贈棲碧山尊師

子真騎鯨上天去山中碧桃開幾度昆明灰盡始逢君
到今獨守燒丹處聞君早歲神骨清手援北斗挂中庭
銅仙夜送玉盤露孤月炯炯秋冥冥碧山清高隔風雨
不省人間暗塵霧酒杯春綠浸瑤花碁局午陰團柰樹
我思子貞不可扳欲往從君勸大還仙人不借綠玉杖
只隔流水行路難行路之難今最苦山鬼跳梁一足舞
蒼精雙龍閤神光待君不來白日暮何當為啟松筠闕

一洗塵土開容顏，鶴背天風甚安穩。攜我更上蓬萊山。

贈別羅庭植

驂騑不受庸鴛羈，志與千里風雲期。才傑每稱天下士，
慷慨必展胸中奇。十載君歸卧雲島，功名歲月閒中老。
燒丹水夜紫霞飛，問字無時綠樽倒。抱琴正好聽鳴泉，
明朝又買西江船。角引曉霜凝別思，梅披晴雪照離筵。
吳山楚水多芳草，黃金臺高幾時到。必逢豪傑語襟期，
白髮誰憐長遠道。人生富貴各有時，朝陽鳴鳳梧桐枝。

醉解吳鉤贈君去歲云暮矣歸母遲

從軍別

將軍披甲控紫駟美人挽轡雙淚流六月炎埃人命脆
軍期稍緩君須留彼為兄弟此為仇朝為公相夕為囚
歲歲年年苦征戰黃金誰足誰封侯煙塵暗天南北阻
英雄盡合回田畝當時兒戲應門戶不謂虛名絆官府
馬鳴蕭蕭渡江浦重喚奚奴再三語將軍臨陣子為御
莫把長鞭鞭馬去

寄從弟鐸及弟銓

牡丹臺前春色滿杏花初開柳芽短霧氣撲簾翡翠寒
池光盪日鳧鷖煖好花時節俱在家銀錢買酒不用賒
長生共祝千歲壽遠信相期八月槎烹鷄斫魚宴親舊
弟也甚恭兄甚友功名好在太平時骨月獨完離亂後
蹇余抱病向天涯每從佳節長咨嗟蘓秦六印終何益
半畝還須學種瓜

和答銓弟

弟云在贛日有誦爾
詩兩辱問起居者

別來兩見春日滿愁思誰云春夜短十八灘頭鳴棹歌
胡姬勸酒銀瓶暖中江開帆先到家意濃不計歸程賒
但云老兄久埋沒詩句何得隨飛槎諸公傳誦無新舊
相憐似是平生友事業青雲如鼠肝文章白髮羞牛後
長年凍餓茫無涯不敢仰天生怨嗟先生歸去且種菊
詞客愁來空饅瓜

題陽和吉灤京詩集

鉦也不識灤京路送君幾向灤京去灤京才俊紛往來

好景惟君獨能賦太平自是多佳句况逢虞揭論心素
金魚換酒謫仙狂彩舟彈瑟湘靈助豈知歸去烟塵驚
山中閉門華髮生雲氣蓬萊心未已夢中猶在東華行
貞元朝士幾人在少年詩思千載名西雲亭上何日到
為君舞劍歌灤京

猛虎行

猛虎長嘯風滿谷十載山中往來熟朝噉牛羊暮殺人
耿耿不畏弓刀逐山翁死後空茆屋山下行人早投宿

妖狐憑威作人語
跳梁白日欺樵牧
南來壯士怒相觸
彎弓射虎穿虎腹
閃爍雙睛甘就戮
髑髏作枕皮為褥
人生何必書多讀
能事自足驚殊俗
何當更斬長橋蛟
老夫雖死關心目

贈劉子倫

廬陵周愷文章伯
語語談君不易得
嗟余終日走風塵
到今未覩真顏色
聞君早歲抱奇節
胸中磊落太平策
玉龍霜冷光欲飛
蒼隼秋高影孤掣
交遊四海多才傑

自合貢之天子闕綵筆題詩衡岳雲畫船撾鼓西湖月
衣冠王謝自風流賓客秦黃最超越往年仗劍奮忠烈
戰袍紅濺猩鼯血草檄未吐陳琳詞種柳已近淵明宅
酒酣氣漲激天風一聲長嘯層崖裂登山臨水澹忘歸
聽雨看雲頗愁絕茫茫世事應難測英雄莫遣頭空白
寒盡春生剗雪霜海濶天高排羽翮何當攜手銅駝陌
蓬萊羣仙朝帝側醉滄溟波鱸六鰲老懷浩蕩從君說

滄洲灌夫詩為周子諒賦

往年曾踏滄洲路滄洲仙人留我住紫霞裁剪成春衣
到今挂在珊瑚樹十載人間走塵霧惟愛周郎讀書處
雲氣寒深連竹松江波晴漲搖窻戶清曉中庭遺鶴羽
太乙青藜夜相語晚菘春韭東西畦烏啼桑陰日當午
浦雲分送疎疎雨抱甕歸來不知苦嗟我已負滄洲期
羨君獨得滄洲趣江山今古武陵源姓名伯仲蘓公圃
畦外有田多種黍長使糟牀壓香醕招隱先須招我來
到門不用分賓主

葵花歎

朝見葵花長歎息
暮見葵花重於邑
白日攜光萬彙蘓
寸心炯炯誰能識
蠟光膩粉花正開
翠袖捧出黃金杯
再拜君王千歲壽
六龍迎駕扶桑來
朱門厭逢車馬客
移花遠置山巖側
不辭辛苦灌葵根
遮莫浮雲翳空碧

寄友

東岸桃花西岸柳
來往扁舟共盃酒
去程易遠情易疎
長亭落日空回首
南山山下黃菊叢
采采寒花霜露濃

蝶恨蜂愁時節去老懷且復相為容風雨昨朝籬竹倒
牛羊亂蹴荒山草草木無情難自保人事悠悠何足道
黃金多貯交情好

呈羅伯剛文學

正月初四日伯敏兄見過我桂樹林辱拜老
親語及先舅志行房下事重增感哀先舅諸
子姪留江外者存亡雖未可知而其田土在
鄉里者多寡宜有可攷且韓謚祀充神恐不

歆隣於若教生者何忍僕謂宜白諸親者尊者奉靜季翁父子之主遷於羅氏祠堂而籍其田土之入以助歲時之祭甚義舉也俟江外者歸完璧外府又何難焉僕侍老親貧甚無能為役謹賦長句以呈惟伯仲究心焉

羊郎不過西州路痛哭當年獨何故甥舅深情江水長
今我思之更愁苦葛山老屋依巖樹杖屨往還經幾度
池光凝墨草帶垂正是仙翁讀書處仙翁騎鶴渺何許

零落殘雲春景暮不消鬢雪添眼花到今長者傳佳句

志行有詩云臘盡未消頭上雪
春來惟長眼中花此甚工巧麒麟高塚舊松楸燕子

他家好門戶嗟我重來淚如雨早時鬢髮今垂素再拜

中郎問家譜封胡羯末俱清楚乃知喬木盤根深萬葉

千枝承雨露澄清淮海藉英雄亢宗事業寧無補夜讀

羣書霜月明秋懸雙劍蛟龍舞振耀家聲文且武綿綿

葛藟江之澣邱山祠堂今誰主仙翁配食神靈聚豈無

他人我同祖蒼崖勒碑照千古

寄羅惟巽

善製
筆

四年不見羅文學綠鬢朱顏宛如昨酒杯春滿聽啼鶯
琴響夜寒彈別鶴鶴飛冥冥遡寥廓仙人遣送長生藥
丹砂九轉飛靈光玉虹白日穿林壑豈無蹤跡到城郭
詞林近日傳新作待月光分荷露圓掃雲晴帶松花落
高懷自是貯冰清而我胡為困塵濁愁心千尺遊絲懸
俯仰交情誰厚薄白髮為儒世所輕臨池學書意蕭索
聞君近有山中約狡兔何時當就縛

題鄧家婦王氏詩卷

青原之北書臺東，高官厚祿多才雄。一死獨稱鄧家婦，
立身豈在文章工。黑風吹沙舞魑魅，劍花凝碧血流地。
紅顏薄命誰不憐，高風能使男兒愧。鄧侯莫傷鸞鏡空，
厚夜招魂歸故宮。結髮深恩不相負，今日始見修齊功。
茫茫世事東流水，鄧侯容髮今何似。黉宮有井井有人，
重到讀書須向此。

和酬歐陽伯庸

往年讀書竹深處君家叔父相賓主一門羣從君最奇
賦詩已有驚人句秋高沆瀣瀉金莖日迴瑤臺森玉樹
邊烽飛度吳江浦燕歸盡失舊門戶十五年間百憂集
相逢不敢訴艱苦昨者見君俱老蒼形容雖變氣如故
青眼惟逢舊客開素衣不受緇塵汙松下長琴按新譜
流水高山必自語聽者不知復不顧始見高人有真趣
乃仍食貧忍羈旅俯仰詞林誰比數射工伺影江波暮
長日閉門傲寒暑雲松千尺冥冥風野桃三月瀟瀟雨

題龍湖小影圖贈劉文周

龍湖春水浮翠烟柳絲千尺繫漁船
漁歌唱得歸來篇
龍湖秋月浸寒玉桂花香壓樽中綠
琴聲彈作高山曲
斯人何似似飛仙是誰妙手分清妍
人間今日畫圖傳
薜荔分陰網茆屋露瀉空青沐
松菊白鶴歸來晨自沐
蒼龍玩珠湖水寒虹光飛逗霜毫端
賦詩寫徧青琅玕
世上功名舞豪傑白髮青衫腰屢折
誰肯山中採薇蕨
君心直與古人期朱顏綠鬢人莫窺
如何畫史能相知

彭郎意匠自竒絕使我一見神飛越
小山招隱歌三疊我家更在深山深
彭郎何日能相尋畫我高秋桂樹林
桂林近接龍湖上與君杖屨共徃還
何須更看青松障

答龍叔起

早歲功名望吾子寶匣倒流三尺水
一朝騎馬稱將軍鄉里小兒盡風靡
詩句烏絲寫兔毫除書紫泥印宮紙
移席花間待客至俸錢沽酒日餘幾
才傑大用當有時長想風雲平地起
事有不然待消弭中朝達官忽至理

塵飛戎馬塞江淮
日落妖狐闕閭里
東西奔走十六年
今日見君雜悲喜
一飯不肯蹴權門
獨惜交情保終始
作詩寄歐思不羣
大音洗我箏笛耳
我欲煩君重見歐
著身更好山巖裏

靜思集卷三